

Il 13 da fenadur: Sogn Anacletus, papa e marter



Sogn Anacletus, il quart papa suenter sogn Pieder fuva oriunds da Athena, marcau principal dalla Grecia. Siu bab zun honoreivels ha giu tutta premura per siu fegl e mess el a scola, per ch'el daventi in virtuos e qualificau um, perquei ch'el fuva in fetg talentau mattatsch. Sogn Pieder ch'ei arrivaus ad Athena ha viu il giuven ed immediat encurschiu che quel, muort sias bunas qualitads, savessi daventar in fideivel survient da Diu. Sogn Pieder dat tutta breigia da mantener il giuven sin la vera cardientscha. Anacletus ha capiu las raschuns dil sogn, ha cooperau alla divina clamada ed embratschau la cardientscha catolica da Jesus Cristus.

Suenter esser battegiu, carscheva il sogn giuven taluisa en ina exemplarica pietad, fuva schi premuraus en la cardientscha e talentaus che sogn Pieder ha ordinau el diacon e cuort sisu augsegner. Sco sacerdot surveva Anacletus a siu meister sogn Pieder en tuttas funcziuns apostolicas, cumpignava el sin ils viadis e sestentava marvegliusamein per converter ils nuncartents. El ei buca mo staus in vegliont pastur dallas olmas sut il grond sogn apiestel, mobein era a ses successurs: papa sogn Linus, sogn Cletus e sogn Clemens. Tschun meins suenter il marteri da papa sogn Clemens ei Anacletus daventaus papa.

Da quei temps sut igl imperatur Trajanus vegneva la Baselgia persecutada sgarscheivlamein. Paucs marcaus deva ei, nua ch'ins havess buca saviu numnar si in grond diember da marters. Plazzas, gassas e teaters fuvan bugnai cul saung dils cristians. Ei vargava strusch in di ch'in u l'auter dils fideivels fuva buca marterisau. Dapertut anavon stevan cruschs, fuortgas, rodas, tgierts ed auters instruments dalla mort paregiai. Principalmein a Ruma vegnevan ils cristians marterisai crudeivlamein. Uestgs e spirituals fuvan ils emprems da sponder saung, manegiond ils tirans, sch'ils patur fussen ord ils peis, vegnessen las nuorsas gleiti ad esser spatitschadas, scarpadas ni surmenadas tier l'aduraziun dils dieus jasters. Ils apostels sogn Pieder e sogn Paul havevan dau lur veta per Jesus Cristus, semegliontamein sogn Linus e sogn Cletus.

Ord quei travigliu stan dalla sontga Baselgia po scadin cumprender con ch'ei ha tuccau ad Anacletus da luvrar e suffierer per governar la nav da sogn Pieder sin ina mar schi stemprada. Mo sco il sogn papa fuva adina paregiu da dar vi sia veta per defender la cardientscha, aschia temeva el buca da confortar ils fideivels ed animar els da star statteivels e generus e buca temer ils tirans, ils turments e da selegrar da saver unfir si lur veta per amur da Jesus Cristus. Per reglar e mantener la disciplina ecclesiastica ha quei sogn papa fatg enzaconts nizeivels tschentaments. El ha cumandau che tuts fideivels cartents che seigien presents alla sontga messa, deien mintgadi sin la fin da quella sepevergiar per ton pli tgiunsch semantener en grazia cun Diu e per retscheiver ina forza spirituala per acceptar e suffierer ils turments che smanatschavan dapertut.

Igl esser cristian da quei temps fuva sco da ver il cunti vid la gula. Per tals motivs ha papa Anacletus dau quei camond als fideivels sut peina da vegnir scatschai ord la cuminonza dils

cartents e buca schar vegnir en baselgia quels che lessen buca mintgadi far la sontga communion. El ha era vuliu che per consecrar in uestg stoppien treis auters uestgs esser presents per far las ceremonias dalla consecraziun, sco quei che sogn Pieder veva giu gia avon ordinau. Semegliontamein ha el era vuliu ch'ils spirituals vegnien ordinau publicamein da lur agens uestgs, sinaquei che scadin sappi enconuscher las vertids ed ils merets da quels che vegnien ordinau magisters e survients dalla Baselgia. Plinavon ha el cumandau a tuts prelati e spirituals da purtar cavels liungs u barba liunga, per ch'ils survients dalla Baselgia sedifferenzieschien dils seculars buca mo cun la buna veta, mobein era cun la modestad externa da sevestgir.

Enzacontas zun nizeivlas brevs ha el aunc scret per il bien guvern dalla Baselgia. Per enzenna d'engraziament e devoziun enviers sogn Pieder che veva mussau ad el la vera cardientscha, ha sogn Anacletus baghegiu sur la fossa da quei grond apiestel ina baselgia e numnau quella la victoria dils apostels. Duront la persecuziun ei quella adina restada schurmegiada. El vatican ha il sogn era benediu in cert liug per la sepultura dils papas. El santeri dils cristians ha el era reservau certs loghens per satrar ils sogns marters. En tuts graus ha quei grond vicari da Cristus mussau ina gronda pietad, ina nunsurveseivla premura, ina generusa veglontad ed ardenta carezia per la honur da Diu e per il salit dallas olmas. El ha consecrau sis uestgs, tschun augsegners e treis diacons. Finalmein suenter haver regiu la sontga Baselgia duront nov onns cun grondas miserias e fadigias, eis el vegnius marterisau ils 13 da fenadur digl onn 88.

Reflexiun

Denter autras sontgas ordinaziuns che sogn Anacletus ha fatg, ei stau quella che tuts fideivels deien mintgadi seolvergiar, per entras quei divin paun viv retscheiver la necessaria curascha e forza da confessar publicamein la cardientscha da Jesus Cristus e da suffierer generusamein ils turments ch'ils tirans paregiavan mintgadi. Da nies temps, per grazia da Diu han las persecuziuns calau si. Auncallura stein nus en biars prighels da piarder, sche buca la cardientscha, lu silmeins la grazia divina tras quei che nus urregein memia pauc encunter il demuni, il mund e la carn ch'ei nos inimitgs.

Dil temps dallas persecuziuns fuvu denter melli marters strusch d'anflar in che per tema dils turments, vess negau la cardientscha. Ussa en nies temps da pasch, ei forsa denter melli cristians strusch d'anflar in che surventscha las tentaziuns, cun la qualas nus vegnin mulestai da nos inimitgs. E danunder deriva quei? Da nuot auter che ord munconza d'ina vengonza communion ni mo ord spira cerimonia ni mo per disa che tuts van. Quel che vul viver en grazia cun Diu e dumignar sias schliatas pissiuns, sto ver la dretga e vengonza disposiziun per saver retscheiver il ver paun dalla veta ch'ei il sontgissim Sacrament digl altar. Weisb. Croiset.